

M137: Melker Marienlied

- 0,1 jû in erde .
0,2 leite Aaron eine gerte .
0,3 diu gebar mandelen .
0,4 nütze alsô edele .
0,5 die süeze hâst dû vüre brâht .
0,6 muoter âne mannes rât .
0,7 sancta Maria .
0,8 jû in deme gespreidahe .
0,9 Moyses ein viur gesach .
0,10 daz holz niene bran .
0,11 den louc sach er obenân .
0,12 der was lanc unde breit .
0,13 daz bezeichnenet dîne magetheit .
0,14 sancta Maria .
0,15 Gedeon dux Israel .
0,16 nider spreite er ein lampvel .
0,17 daz himeltou . die wolte
0,18 betouwete . almitalle .
0,19 alsô kom dir diu magenkraft .
0,20 daz dû würde berehaft .
0,21 sancta Maria .
0,22 mersterne morgenrôt .
0,23 anger ungebrâchet .
0,24 dâr ane stât ein bluome .
0,25 diu liuhtet alsô schône .
0,26 si ist under den anderen .
0,27 sô lilium under den dornen .
0,28 sancta Maria .
0,29 ein angelsnuor gevlohten ist .
0,30 dannen dû geboren bist .
0,31 daz was diu dîn künneschaft .
0,32 der angel was diu goteskraft .
0,33 dâ der tôt wart ane erworgen .
0,34 der von dir wart verborgen .
0,35 sancta Maria .
0,36 Jesaias der wîssage .
0,37 der habet dîn gewagen .
0,38 der quat wie vone Jesses stamme .

0,39 wüehse ein gerte ime .
0,40 dâ vone schol ein bluome varen .
0,41 diu bezeichnenet dich unde dîn barn .
0,42 sancta Maria .
0,43 dô gehîte ime sô werde .
0,44 der himel zuo der erde .
0,45 dâ der esel unde daz rint .
0,46 wole erkanten daz vrône kint .
0,47 dô was diu dîn wambe .
0,48 ein krippe deme lambe .
0,49 sancta Maria .
0,50 dô gebære dû daz goteskint .
0,51 der unsich alle erlôste sint .
0,52 mit sînem heiligen bluote .
0,53 von der êwigen noete .
0,54 des schol er iemer gelobet sîn .
0,55 vile wole geniezen wir dîn .
0,56 sancta Maria .
0,57 dû bist ein beslozzenu porte .
0,58 entâniu deme gotesworte .
0,59 dû wabe triefentiu .
0,60 pigmenden sô volliu .
0,61 dû bist âne gallen .
0,62 gelîch der turteltûben .
0,63 sancta Maria .
0,64 brunne besigelter .
0,65 garte beslozzener .
0,66 dâr inne vliuzet balsamum .
0,67 der wæzet sô cinamomum .
0,68 dû bist sam der zêderboum .
0,69 den dâ vliuhet der wurm .
0,70 sancta Maria .
0,71 cedrus in Libano .
0,72 rosa in Jericho .
0,73 dû erwelte mirre .
0,74 dû dâr wæzest alsô verre .
0,75 dû bist über engel al .
0,76 dû besuontest den Êven val .
0,77 sancta Maria .
0,78 Eva brâhte uns zwischen tôt .
0,79 der eine ienoch rîchesenet .
0,80 dû bist daz ander wîp .
0,81 diu uns brâhte . den lîp .
0,82 der tiuvel geriet daz mort .
0,83 Gabriel kunte dir daz gotes wort .
0,84 sancta Maria .
0,85 kint gebære dû magedîn .
0,86 aller werlte edelîn .

0,87 dû bist gelîch deme sunnen .
0,88 von Nazaretech errunnen .
0,89 Hierusalem gloria .
0,90 Israhel laetitia .
0,91 sancta Maria .
0,92 kûninginne des himeles .
0,93 porte des paradîses .
0,94 dû erweltez goteshûs .
0,95 sacrarium sancti spiritus .
0,96 dû wis uns allen wegente .
0,97 ze jungeste an dem ende .
0,98 sancta Maria .